

Segun Tico Croes di AVP

LOTTO MESTER PAGA PUEBLO PLACA BEK

ORANJESTAD (AAN): Miembro di Staten pa AVP Tico Croes ta exige pa cada persona cu bin cu carchinan cu ela cumpra den e Lotto bergonzoso mester haya su placa bek. E miembro di Staten a manda un serie di pregunta pa Ministro Presidente pa mira si por haya aclaracion di kendenan tabata envolvi den e trampa cu a worde poni pa Pueblo den organisacion di e Lotto di algun dia pasá.

AVP ta di opinion cu aunke nos ta mira cu e gobernante nan ta trata tur posibel pa lubida loke a worde haci contra Pueblo tur esfuerso mester worde haci pa esnan cu a worde engaña haya nan placa bek y esnan cu ta culpable na e estafa sin precedente aki worde castiga.

UN ENGAÑO TOTAL

Despues di un analisis di loke a tuma lugar cu e Lotto pa Deporte, AVP a jega na e conclusion cu aki tabata trata di enganjo total di Pueblo. Na un manera masal nos gobernantenan awo a haya un manera nobo pa saca placa for di saco di nos conciudadanonan.

Bao advertencia falso a stimula miles di nos hendenan pa cumpra carchinan di Lotto cu lo tin premionan sumamente atractivo. A resulta cu e advertencianan tabata puro mentira. Nan tabata ganja Pueblo cu lo tabatin 3.4

miyon florin na premio. Esaki ningun momento tabata berdad. No tabatin ningun sorto di 3.4 miyon florin na premio. Esaki ta ensera cu nan a tene un loteria sabiendo di antemano cu nan ta ganjando Pueblo pero a hacie toch solamente pa gana placa grandi pa gobierno.

PURO MENTIRA

No solamente e 3.4 miyon florin na premio tabata un mentira flagrante cu a engaña Pueblo pero tambe e anuncio cu tabata garantiza cu lo tin 21 ganador di 85 mil florin tabata basa ariba mentira flagrante. E advertencia no ta laga caminda pa duda.

E organisadornan tabata garantisa cada cumprador di un carchi di 5 florin cu e tin 21 posibilidad pa gana 85 mil florin. Esaki tambe a resulta di ta un mentira sin mas. Mescos cu no tabatin e 3.4 miyon florin tampoco tabatin 85 mil florin pa 21 ganador.

TRAMPA NUNCA BISTO

AVP ta considera cu aki a worde poni un trampa pa Pueblo manera nunca antes nos a yega di mira na Aruba. Gobierno hunto cu e organisadornan intencionalmente a saca placa for di saco di nos conciudadanonan sabiendo di antemano cu nan tabata enganando Pueblo. Esaki ta algo imperdonable.

No por ta asina cu gobierno

ta envolvi den algo tan baho. No por ta cu un gobierno ta

bai asina leu di sostene un enganjo total contra henter

nos comunidad cu e meta pa saca placa for di nos Pueblo.